



DEO OPTIMO MAX.

UNI ET TRINO.

VIRGINI DEI-PARÆ, ET S. LUCÆ,
Orthodoxorum Medicorum Patrono.

QUÆSTIO MEDICA.

CARDINALITIIS DISPUTATIONIBUS,
*manè discutienda in Scholis Medicorum, die Jovis vigesima tertiâ mensis,
Februarii, anno Domini M. DCC. XLVII.*

M. PETRO-ANTONIO LEPY,
Doctore Medico, Præside.

An aqua potus omnium saluberrimus?

I.



ERE, cibo, potu, vivimus. Si cum delectu usurpentur hæc tria, vita manat felicior. Eligantur inde salubriora. Ab aëre puro, innubi, libero, sensuum acumen, ingenii bonitas, robur virium. Aëre non certo contraria iis fiunt. Esculentra, ter quaterve partitis ex intervallis assumpta die, crassiora licet, sed masticata diu, cuius profunt, si, ut par est, concoquantur. At leviora nocent avidius deglutita, ingesta præsertim semel tantum die. Tunc indigesta sæpius

A

omni cum noxâ ventriculûm non modò gravant, sed illicò, aut in posterûm omnem pervertunt œconomiam animalem, omni cum functionum latione. Cavendum ideò, ne nimis incautè ingerantur. Digerere opus princeps. Igitur qui masticationem nescit, is animam odit suam, & sibi met-ipsi, etiam inscio, infestus est. Præter hæc, tempestatum, regionum, ætatum, veletudinisque & exercitationis modo atque ratione, eligenda sunt convenientiora, & qualitate, & copiâ, & ordine. Potulenta nec minorem diligentiam requirunt. Eorum, ut ingens necessitas, itâ & salubritas maxima. Id omne quod pro corporis sumitur alimoniâ, ipsius & naturâ potus salubrius committitur, assimilaturque felicitis. Nutrimur enim, ut, id, quod jugiter deperditur & avolat, in corporis substantiam magis propriâ vehiculi conditione reparetur. Quibus ergo tantum sapit palatus, iis cor non sapit.

I I.

UT potuum diversa sunt genera, sic optimum credere par est, quod universum est. Præstat illud, quod omnium animalium extinguendæ sitis, communis mater providaque nutrix paravit natura. Ars suos conficiat parèvè potus cõctione florum, radicum, seminum; succorum expressione è fructibus & racemis, pomaceum, pyraceum, vinum: ex ipsis flammeos ignis ope extorqueat liquores: tot potuum sint, quot species fructuum. Hic potionum ordo est ad tuendam reparandamvè sanitatem, ut, quæ vinosæ sunt magis, sint salubres minùs; Quæ aquæ, salubriores. Vinum, vegetantium licet decus nobile, vitam pãssim jucundiorẽ, sed infirmiorẽ breviorẽque sapius facit. Succus est ex maturis calcatisque uvis expressus, defœcatus fermentatione, at ebullitionis fervore superbior. Spiritu volatili sulphureo, & acido subtili constat, undè tyrannidem exercet. Si meraciùs bibatur, bilem vel facit, vel accendit; si copiosius, turpi vomitu, artuum tremore, sexcentis id genus, omni cum animi perturbatione, & mentem, & corpus à sede dimovet. Id vino debent homines, quòd soli animalium non sitientes bibant. An cum sanitatis detrimento? Judica.

I I I.

TOT à vino mala præcavet aquæ potus. Argenteus limpidusque ille liquor; orbi universo cœvus & communis, fluidissimus est. Particulis constat jugi motu concitatis, quæ vitris opticis undulatâ motione accuratiùs exhibentur prædictæ. Istæ particule læves sunt, solidæ, tenues, sphericæ, seu sphæroidæ, aut oblongæ, aliavè ex physicis figurâ; undè habet aqua, ut corporibus immisceatur, & ea penetret. Eligi illa debet, pura, illimis, pellucida, levis, inodora, non acris, non salsa palato grata. Facile calefeat, frigescat, distribuatur. Talis est, Parisiorum altor, sequana sanus, qui urbi reginæ allabitur, & omnis qui è vivo fonte manat, quemque jam salutat sol matutinus è sublimioribus erumpentem locis. Quæ scaturit unda per ductus purissimos, item sana est; ut illa, quæ è vernis Hibernisque nubibus, minimè impuris nec procellosis, depluit: Quæ cysternis laudabili sabulo instratis sinè plumbo custoditur. Quæ ventri & hypochondriis minimè gravis est. Tales aquæ rei omnis viventis potus. Aquâ nutriuntur plantæ & crescunt, ut genus omne animantum. Mên-
ha in vasculo aquâ referto radices agit, & folia, Salix arbor in terrâ, ut di-

3

eunt, mortuâ, si aquâ purâ perfundatur, molem & legitimam acquirit. Aquatili pecori spiritus ab aquâ. Suave elementum, aqua est, Chymicumque principium, animatis corporibus & mixtis necessarium maximè, maximeque ad vitam generationemque momenti.

I V.

U NDA purior, cæteris potibus fermentatis, longè salubrior est. Cibi vehiculum est, & præstantius. Non pro arbitrio, sed necessitate, ingeritur: omnique fœlicius alio distribuitur potu. Palato non tantum sapit: sed villos molles, fibrasque flexiles fingit semper asperiores à vino. Purpureum laticem, singulosque & omnes corporis humores ex naturæ votis fluidos reddit, à Baccho nimium salibus hispidos. Has aquæ dotes experiuntur præsertim, qui invigilant litteris. Quò magis utuntur aquâ, eò sunt vegetiores: facilius vident, sentiunt alacrius, sapientius ratiocinantur, maturius judicant. Sanitatis tutor est aqua. Hæc dissolvendis cibis, conficiendoque chylo cæteris aprior. Caput & ventriculum non tentat, ut vinum, appetentiam non deijcit, sed excitat. Hujus ope niucus tenax & viscidus stomachi & intestinorum detergetur; status à crispatis induratisque fibris, hypochondriacorum fons & origo, discutitur; laxatur fibra, fluit humor. Miranda utilitas aquæ. Iners alimentum accelerat, spissum solvit, obtundit acre, salsum mitigat, serosam colluviem per renes convehit, præcavetque calculum, & arcet podagram. Ut puritas omnis à vino madida, corrumpitur, sic mens ab eo libera non inquinatur. Novum enim non est, sapientiam adumbrari vino. Profectò libidines, mania, flava atraque bilis, à vino accensa, ab aquâ potenter arcuntur. Attamen insalubres aquas, crudiores, puteales, stagnantes, emendat pauxillum vini. Ità cruciatus colici, morbi articulares, Broncocele, id genus, præcaventur: Ità, qui stomacho sunt debili, iis, ut Timotheo, paululum vini conceditur, & tutè: Ità tandem vino, sed modico, temperatoque semper aquâ, quædam inest salubritas. Interim pauci sunt, etiam ex iis, qui labore improbo victum quaritant, sat robusti, qui & vino & è vino elicitis diù tutòque indulgeant.

V.

E T si animalium corpora igne foveantur & vigeant, natus tamen ille calor temperari debet. Effracto carcere, corporum integritatem citius deuret ignis, nisi aquâ, veluti compede, retineatur. Undè natura nullibi non humiditatem circumfundit. Hæc, quia semper consumitur, semper amat consentientibus reparari partibus, quæ eò salubriores sunt, quò magis agunt necessario. Œconomiam animalem non solum servat aquæ potus; sed & ipsos sanat arcetque morbos. Morbus ferè omnis oritur à villorum rigiditate & spissitudine fluidorum; indè cæco quodam carpitur igne humana constitutio, brevi peritura, ni temperetur. Ab inanitione enim rarè morbi sunt. His in casibus extinctus naturalis calor, cardiacis restaurandus; in cæteris, insitus calor compescendus est. Cùm igitur omnes ferè contrà naturam affectus, à caloris exuperantiâ prominent, repagulis eget ille innatus calor. Aliàs ignis in igne foret, & citò cinis. Morbus, sine quo pauci pereunt, febris est. Hæc, extracto sanguine, tenui dicet, & præsertim aquæ largo cessat potu. Cholera morbo quid, satius?

4

Illius impetum comprimit & sistit aqua; si sat copiosè epotetur. In Tetano pariter rigorem solvit. Frequenti aquæ potu, musculi, qui, tunc quasi sunt ferrei vectes, sensim mollescunt; febrisque, si supervenerit intrà quatuor dies; morbum sanat. Tot commoda, similiaque, ut in podagrâ, variis ventriculi affectibus & capitis, profert intus aqua: tot, nec minora præstat extus. Decocta, capitis niulcet dolores. Affusa repidè, fractis, luxatis, contractis artubus & resolutis, amica est, ut & ulceribus tumoribusque. Balneo, obstructa referat, urinam movet, & diaphoresim, & secessum alvi; solvitque obstructions, fomites morborum. Injecta, dura emollit, aperit densa, tensa laxat, crassa digerit. Hæc non sylemata, sed res. Utramque servat aqua valetudinem. Hic, quia nostra non est quæstio, de Mineralibus aquis, quæ terræ visceribus vires facultatesque quæritant, & de earum eximiis dotibus, addimus nihil. An incredulus adhuc? Vini potatores, abstemiosque consulas. Illi plerumque vitreâ valetudine & antè tempus pereunt: hi solito sunt longioris ævi, mentisque sanioris.

Ergò aqua potus omnium saluberrimus.

Proponēbat Parisiis JOANNES-JACOBUS MESSENCE, Andegavensis, Doctor Medicus Remensis, & Saluberrimæ Facultatis Medicinæ Parisiensis Baccalaureus, A. R. S. H. 1747, à sextâ ad meridiem,